

[Sápmi](#) 13.10.2015 klo 7:26

SámiSoster rahpan Anárii deaivvadanbáikki – buohkat leat buresboahrán

**Anáris lea rahppon gieskat deaivvadanbáiki, mas galgá leat nu
vuollegaš šielbmá, ahte dan badjel duostá lávket. Ii gielas iige
agis leat mearkkašupmi, buohkat leat buresboahrán. Ulbmil
lea oktii vahkus juoga mánnu buđaldeami oktavuodas beassat
deaivvadit.**



Govva: Anneli Lappalainen / Yle Sápmi

Anára searvegottidálu šiljus hakso suovasguolli. SámiSoster-searvvi olbmot dopmet lágidit beavddi. Dán vuoru easkka rahppon doaibmaviesus lea vuorus guoli suovasteapmi ja deháleamos – ovttas borran.

Searvvi ságadoalli Ristenrauna Magga lea movtta go doaibmaviesus lea hušša. Dákkár doaibmavissui lea dárbu.

– Vuorrasut olbmui ii leat báiki gos deaivvadit. Iešguđet gilis sii čohkkájit okto go nuorat geardi lea vuolgán bargui. Ulbmil lea oktii vahkus doallat doaibmaviesu rabas ja juohke háve lea juoga prográmma, muitala Magga.

"Hearrá dilli, galggašedje eambo boares olbmot boahtit"

Heijjá-Elle gal lovttii bures doaibmaviesus. Somámus lei deaivat eará olbmuid.

-Dat, ahte oaidná nuppiid olbmuid, maid ii oainne gostige eará go soames hávdádusain. Dáppe dasto oaidná sin.

Heijjá-Elle rápmo, ahte doaibmaviesus lea njuolga hearrá dilli go beassá gárvves biepmu borrat.

-Dat lea hearrá dilli. Galggašedje eambo boares olbmot boahtit deike. Ánġel guovllus maid galggašedje daid boares olbmuid buktit deike, dadjá Elli Näkkäljärvi.

Láibun, joñaid vuoššan, muittašeapmi...

Doaibmaviesus leat viežžan málle Eanodaga Luovatupas. Anáris lea juohke vahkkui smihtttojvovon sierra prográmma. Iige doaibmavissui boahtin geahča agi iige giela.

– Doaibma lea beaivit, dat bohtet geat astet. Doaibma lea sihke sáme- ja suomagillii. Ii dárbbáš jurddašit, ahte mun in máhte sáme giela ja danin ii duosttašii boahtit, čilge Magga.

– Mii sávvat, ahte dás boahtá buohkaid oktasaš deaivvadanbáiki, gosa lea lunddolaš boahtit ja mas lea nu vuollegaš šielbmá, ahte dan badjel duostá lávket.

Anára doaibmaviesu prográmma gávdno [dáppe](#).

Seammalágana doaibmaviesu áigot Vuohčču

SámiSoster-searvi lea ohcan ruhtadeami, ahte Vuohčču rahpet seammasullasaš báikki. Juovlamánus čielgá, ožžotgo sii ruhtadeami. Jus ožžot, de sii ovttas ovttasbargoguimmiiguin bargagohtet Vuohčču doaibmaviesu ovdii.